

TE HONOHORAA API

I neia i te piha neneiraa na te Ekalesia a Iesu Mesia i te Feia
Mo'a i te Mau Mahana Hopea Nei i Papeete, Tahiti,
i te mau fenua Sotaiete, i te mau avae atoa.
Te hoo e piti farane i te matahiti hoê.

Nu. 10.

Atopa 1929.

Mat. 23.

*"Ia tae to oe ra hau. Ia haapaohia to oe hinaaro i te
fenua nei, mai tei te ao atoa na" (Mutaio 6:10.)*

Te Faaroo no te Feia Mo'a Mau.

Ua iritihia teie nei parau na roto mai i te buka: "Te Hiro'a Faaroo"
tei papaihia e Tamate Aposetolo; Faaauhia ei reo Tahiti e Elita.

*HIRO'A FAAROO 10. Te faaroo nei matou * * * *
E e parahi tino mai hoi te Mesia ei arii i nia iho i te fenua
nei.*

(E tuatiraa teie nei parau.)

TO IESU ARIIRAA I NIA I TE AO NEI.

UIRAA 1. Eaha tatou e haapii ai i to Iesu haereraa mai?
P. Ua faarii-noa-hia te mau parau no to Iesu fanau-
raahia e to'na oraraa e tae noa'tu i to'na poheraa, e to te
ao atoa nei. E ere te Bibilia anaé, tei faaite mai i te reira,
e rave rahi atu â râ te mau parau na te taata iho, tei na rei-
ra maira.

Ua fanauhia maira Iesu i te vahi haehaa, e ua ite-ore-hia oia, maori râ e vetahi mau taata iti o tei tiaï noa no to'na taeraa mai. Ua tohu noa maira te mau peropheta, mai te matamua mai â, no to'na haereraa mai, area râ, a tae mai ai oia ra, aita to'na iho i farii maitai mai ia'na, e ua hamani-ino-hia'tura Oia e tae noa'tu i to'na poheraa.

Ua riro te mau taata o tei taparahi Ia'na, ei feia mata-po, e te taria turi, e te aau etaeta, no te mea aita ratou i te i te auraa mau no Ta'na ohipa. Ua na reira atoa ratou o tei patoi i te mau parau tohu no To'na haere-piti-raa mai, e no reira to tatou haapiïraa i tana mau mea ra, ia ineine maitai tatou no taua mahana rahi ra.

Uiraa 2. E mea nahea te mau parau a te Bibilia i te haapapu mai ia tatou no To'na haere-piti-raa mai?

P. Aita e rahi te mau parau i roto i te Faufaa Tahito no To'na haere-piti-raa mai, no te mea, te hió noa ra te feia i papai i te reira, i To'na tae-matamua-raa mai; area ra, ua ite papu te tahi no te mau peropheta i taua tae-hana-hana-raa mai nei; e ua tohu atoa maira Iesu iho e Ta'na mau aposetolo atoa hoi i te hoé mau parau maramarama roa no te reira.

Parau Tauturu: Ua na ô maira Davida e, "Te haere maira to matou Atua, e ore a mamû noa; e auahi tei mua ia'na i te amaraa, e vero rahi tei haati mai ia'na." (Salamo 50:3) Aita teie mau mea i tupu i to Iesu haereraa mata-mua e no reira te te piti o To'na haereraa ia.

Ua faaite maira Iuda i te tahi parau no te reira ta te peropheta ra o Enoha i ite. A hió i roto i te Iuda 14-15.

Ua haapii atura Iesu i taua parau nei i Ta'na mau aposetolo e ua na ô maira ratou e: "E faaite mai oe ia matou i te tupuraa o taua mau mea nei?" Ua pahono atura Iesu mai te faaite atu ia ratou i te mau mea e rave rahi, e Ta'na parau hopea i reira i te na ôraa mai e, "E e parau-haere-

hia te evanelia o te basileia nei e ati noa aé teie nei ao, ia ite te mau fenua atoa: o te hopea ihora ia i reira ra." Hió i te Mataio 24:1-14.

Ua na ô faahou maira Oia i Ta'na mau aposetolo e: "E ara, eiaha outou ia vare; e rave rahi hoi te haere mai ma to'u nei I'oa, i te na ô-anaé-raa e, O vau te Mesia; e teie iho taua tau ra; e teie nei, eiaha outou e pee atu ia ratou. E ia faaroo outou i te roo tamaí e te aueue, eiaha e mataú; e na mua hoi te reira i te tupu e tia'i; aita râ e fatata te hopea i reira. Ua parau atura oia ia ratou, E tia mai te tahi fenua e aro i te tahi fenua, e te tahi basileia e aro i te tahi basileia: e te aueue rahi i te fenua i tera vahi, i tera vahi, i te oé hoi, e te maí rahi, e te mea mehameha e te semeio rahi i te itearaa i nia i te raí. O outou na râ te haruhia mai na, e e hamani-ino-hia, i te tuuraa'tu ia outou i te mau sunago ra, e i roto i te tapearaa, e e aratohia i mua i te aro o te hui arii, e te mau tavana, no to'u nei íoa. E e riro te reira ei faaiteraa parau na outou. E tena na, e opua maite outou, e eiaha roa e na mua i te imi i te parau ei parauraa'tu. Na'u hoi e horoa'tu i te parau na outou e te paari, eita roa e tia i to outou mau enemí atoa ia faaore mai e ia patoi mai. E haavarehia ra outou e to outou mau metua, e te mau taeae, e to outou iho fetii, e to outou mau tauá iho; e e pohe te tahi pae o outou na ia ratou. * * * *

* E e piri to roto i te mahana i reira, e to roto i te mara-ma, e to roto i te mau fetia; e e ati rahi to te mau fenua i te ao nei, e te ahoaho; e te miti e te are i te harururaa; e te tarapaperaa o te aau taata i te mataú, e te manaóraa i taua mau mea e fatata i te tupu i te ao nei; e pau hoi te mau mea o te raí ra i te uenehia. Ei reira ratou e ite ai i te Tamaiti a te Taata i te haerea mai na nia i te ata ma te mana e te hanahana rahi. E ua tupu anaé teie nei mau mea, e nânâ i to outou mata i nia, e faateitei i to outou upoo, te fatata

maira hoi to outou ora.” (Luka 21:8-28)

I te taimē i rave-ê-hia’tu ai Iesu i te raí, te hió atura te mau aposetolo ia’na, e ua fâ mairā te melahi mai te parau e; “E te mau taata o Galileia nei, eaha outou i tia noa’i e i tiatonu mârô ai i nia i te raí ra? O Iesu nei â, tei ravehia aénei i nia i te raí, e hoi mai ia mai te reira atoa ra, mai ta outou i ite atu ia’na i te revaraa’tu i nia i te raí ra.” (Ohipa 1:11)

Uiraa 3. Te vai atura anei te tahi ite no te haere-pitiraa mai maori ra te Bibilia?

P. Ua na ô maira te parau papai e, “I roto i te vaha o na ite toopiti, tootoru râ e papu ai te mau mea’toa.” No reira, ua riro te Bibilia ei ite matamua, e te vai atura te Buka a Moromona e te Buka Fafau o tei riro ei na ite no te reira.

Parau Tauturu: Ua faaite atura Iesu i te mau mea e rave rahi, “E ua faaite papu atu i te mau mea atoa, o tei tupu mai te matamua ra, e te tupu hoi e tae noa’tu i to’na taeraa mai i to’na ra hanahana.” (III Nephi 26:3) Hió atoa i ta’na parau i ta’na ra aposetolo tootoru tei papaihia i te III Nephi 28:7.

Te na ô maira te parau moá i teie nei ui e; “E tupu hoi teie, o tei mataú ia’u ra te tiaí ra ia oia i te mahana rahi o te Fatu ia tae mai, oia hoi, te mau tapao no te haereraa mai no te Tamaiti a te Taata, e tapao hoi te iteahia e te mau mea maere, e faaitehia hoi te reira i nia i te raí i nia ra, e i te fenua i raro nei; e ite hoi ratou i te toto e te auahi, e te ata auahi hoi; e i mua atu i te taeraa mai no te mahana o te Fatu ra, e haapourihia te mahana, e e faarirohia te marama ei toto, e te fetia hoi te topa mai no te raí mai; e haaputuhia mai hoi te toea i teie nei vahi; ei reira ratou e tiaí mai ai ia’u, e inaha, e tae atu hoi au; e ite hoi ratou ia’u i roto i te ata no te raí i te faahu-raa-hia i te mana e te

hanahana rahi, mai te mau melahi moá atoa ra; e o tei ore i tiaí mai ia'u ra e tapu-ê hia ia." (Buka Fafau 45:39-44)

Tei roto i te mau heheuraa no teie nei anotau te hoé mea ê, oia hoi, te na ô maira te parau e, "A tatarahapa, a tatarahapa te fatata roa mai nei te Fatu". E ua rahi roa te mau reó i te piiraa'tu i te reira parau, e ere te hoé anaé, mai to te reó no te hoé i te medebara, e rave rahi râ ia.

Uiraa 4. Ua papu anei te hora no To'na taeraa mai i te taata nei?

P. Aita roa i papu te hora, maori ra, ua faaitehia maira te mau tapao e rave rahi e na roto i te tupuraa i te reira ua ite tatou e, ua fatata roa mai nei te taime. "Area te hora e te mahana aore roa e taata i ite aore atoa te mau melahi i nia i te raí ra, e ore hoi ratou e ite e ia tae noa mai oia." (Buka Fafau 49:7) E riro ia to'na taeraa mai e mea hitimaue ia ratou o tei ore i hió noa'tu ia'na. "E tae mai râ te mahana o te Fatu mai te eiâ i te rui." (II Petero 3:10) Ua na reira ihô â to'na taeraa mai i te taata haapao ore. "E teie nei, a aore, hoi outou i ite i te mahana e te hora atoa e tae mai ai te Tamaiti a te taata." (Mataio 25:13)

(Tuatihia teie nei parau.)

Te Haapaoraa ei Faufaa i te Taata'toa.

I te medebara o tei roto i te tufaa fenua o Galilea, ua rave Iesu i te hoé semeio rahi i rotopu i te feia i tairuru i reira no te faaroora i te mau parau ta'na i parau. Ua mairi hoi te râ i te hopea o te mahana, e ua tupu hoi te hinaaro o te mau aposetolo ia tonote mau taata i to ratou mau fare ia tamaa e ia taoto hoi. Ua tonote atura râ Iesu ia ratou ia imi i te rahiraa o te maa tei rotopu i taua feia ra, e ua itehia'tura hoi i na faraoa e na ía hoi. Ua rave Iesu i te maa

i afaihia mai, haamaitai atura e ua tamaa te mau taata, e paia aera, e te vai noa ra te maa toe. E te mau taata o tei amu i taua maa ra e pae tauasini ia.

Ua putapu te mau aau o te mau taata'toa o tei ite atu i te semeio rahi i ravehia i rotopu ia ratou ra, e ua maere ratou i to Iesu mana. E ua arue atu ratou i te Atua no te maitai rahi ta ratou i faarii.

I to Iesu faaeara i nia i te ao nei, e rave rahi hoi ia te mau ohipa i ravehia e ana ia fariu i te aau o te mau tamarii a te taata ia'na ra, e hou rii i to'na revaraa'tu i nia i te raí, ua horoa mai oia i te mana i te mau Aposetolo e te tahi atu â pupu taata, ia rave ratou i te ohipa mai ta'na i rave, e ua faaue maira oia ia ratou, ia faatia ratou i te amaa o te Ekalesia i te mau vahi atoa ta ratou i haere. Mai te reira taima e tae roa'tu hoi i te hopea o to ratou oraraa tahuti nei, ua purutia haere taua mau tavini nei i te mau tufaa atoa o te ao nei, ma te afai i te Evanelia i te mau taata atoa. Ua faatia ratou i te mau amaa o te Ekalesia i te mau oire e rave rahi e ua haamana hoi ratou i te hoé pae o te mau taeae ia faatere i te mau ohipa i reira. Ua haapii atura ratou i te mau taata, o Iesu ia te Tamaiti a te Atua, na'na i haapii mai i te huru o te Atua metua, e ua rave hoi Oia i ta te Atua, a faaea ai oia i nia i te ao nei.

Ua rave Iesu i te mau semeio, ua rave atoa ta'na mau tavini i te mau semeio, na roto i to ratou faaroo. Ua faaamu Iesu i na tauasini taata ia ore to ratou poia, area ra, ua haapii maira oia e, o vau te pane ora: o te haere mai ia'u nei, e ore roa ia e poia, e te faaroo mai ia'u nei, e ore roa ia e poiha."

I roto i te parau poto ta Iesu i parau, te vai ra te auraa rahi. Mai te mea te imi nei tatou i te pane ora, ua na ô maira Iesu, ia pee tatou ia'na e tia'i, no te mea, aita atu e pane ora. Ua haapii maira oia i te mau parau faufaa no te Eva-

neli
e te
ohip
mau
huan
e ora
atoa
aite
apii

imi t
te m
pane
Iesu
mai
outo
haap

na te

I
lesia
aita t
te ma
ri ae
i te l
lesia
hia.
Iesu

nelia, oia hoi, te faaroo, e te tatarahapa, e te Papetizoraa, e te tuuraa rima no te horoaraa i te Varua Maitai, e te mau ohipa atoa i au na te taata ia rave. Ua vaiho maira oia i te mau Aposetolo i na mea e toru, oia hoi, te mana o te Autahuaraa, e te Ekalesia ta'na i faatia, e te Evanelia, te ravea e ora'i, a ora'i te mau Aposetolo, te vai noa ra te mau mea atoa mai ta Iesu i horoa mai, a pohe atu ai râ ratou ra, te faaite papu mai nei te mau parau tuatapapa, ua tae te mau haapiiraa huru ê i roto i te Ekalesia.

Mai te mea, e homa, te imi nei tatou i te pane ora, ia imi tatou i te ravea i ta Iesu mau haapiiraa e tia'i. E mai te mea ua faahuru-ê-hia te Ekalesia ta'na i faatia, teihea ia te pane ora e te ravea e noaa mai? Teie, ua faatia faahou Iesu i ta'na Ekalesia e te vai nei te reira i to tatou fenua. E mai te mea te manaó na outou e, e feia paari tatou, e imi ia outou i roto i te reira mau haapaoraa e vai na no te mau haapiiraa a Iesu te Mesia.

Ua na ô maira Iesu e, "E ite outou i te parau mau, e na te parau mau outou i faatiamâ.

— *Papaihia e Toma*

Petero e Ta'na Mau Taeae.

I na avae i mairi aénei, ua taio tatou i te huru o te Ekalesia i te tau o Iesu Mesia e tana mau Aposetolo. Area ra, aita taua Ekalesia i vai mai to'na huru tahito. Mai te au i te mau tohu e te mau parau moá, ua taiva roa ratou. I muri ae i te poheraa o te mau Aposetolo, ua tamau â to i rapae i te haamani ino i to te Ekalesia. Ua manaó ihora te Ekalesia e, e mea tia ia haamauruuru i to i rapae, e ua na reira hia. E ua na reira noa ratou i te vaiho i te tahi mau oroa ta Iesu Mesia i tuu i roto i ta'na Ekalesia, e ua rave ratou i te

tahi mau oroa na roto mai i te haapaoraa na to ratou mau enemi. E ua na reira noa ratou e taiva roa atu ai te Ekalesia atoa.

Mai te mea e taio tatou i te mau parau tuatapaparaa i reira e ite ai tatou e, ua faarue ratou i te mau oroa ta Iesu i tuu ia ratou ra. E ua riro mau taua Ekalesia ra ei haapaoraa taata anaé. Ua ore te Autahuáaraa ia ratou e aita to ratou e mana ia rave i te ohipa a Iesu Mesia. Ua faaaui ratou i ta ratou iho mau ture, e ua haavi, e ua haamani ino ratou i te mau taata o tei ore i haapao i taua mau ture a ratou ra. E aita atoa ratou i faatia i te mau melo ia haamori i te Atua mai te au i to ratou iho hinaaro. E no reira, ua faaite atu ra ratou i to te ao atoa, e ua ere roa ratou i te Autahuáaraa, oia hoi, te mana o te Atua.

Mai te mea te vai nei te Ekalesia a Iesu Mesia i te ao nei, e mea papu ua faatia-faahou-hia taua Ekalesia ra na roto i te mana o te Atua. Maite faaite papu mai ia tatou nei ua faatia-faahou-hia te Ekalesia a Iesu Mesia i teie nei anotau hopea nei. Ua ite papu te mau Peropheta e e taiva te Ekalesia. Ua tae mai taua Melahi, ta Ioane-pi-pi-Here i ite a vai titi ai oia i te motu Patamo, i te na ôraa e "Hio atura vau i te hoé melahi i te maueraa na ropu i te reva nei ma te evanleia e tia i te vairaa ra ei pororaa'tu i te feia parahi i te ao nei ra, i te mau fenua atoa e te mau opu atoa, e te mau reó atoa, e te mau nunaa atoa, e i te pii-huaraa te reó e, A mataú i te Atua, e faahanahana'tu ia'na; Ua tae hoi i te hora faautuaraa na'na ra: e haamori outou ia'na, i tei hamani i te raí, e te fenua, e te tai, e te mau pape pihaa ra".

I te mau mahana tahito a vai ai te Ekalesia i raro aé i te faatereraa o te mau Aposetolo, ua hiópoa-maitai-hia te mau taata o tei rave i te mau toroa teitei o te Autahuáaraa. Ua maiti-hia te mau taata tiamâ ia tia ia ratou ia farii i te

Varua Maitai. E na reira atoa te mau melo o te Ekalesia mai te au i ta Paulo parau i Korinetia "Aita outou i ite e, o te hiero outou o te Atua, e te parahi ra te Varua o te Atua i roto ia outou na. E ia haaviivii te hoé taata i te hiero o te Atua ra, e pohe oia i te Atua; e moá hoi to te hiero o te Atua, e taua hiero ra o outou ia."

Na roto i te haapao-ore-raa o te mau taata rahi i roto i te Ekalesia tahito ra, ua papu e aita roa e nehenehe i te Varua Maitai ia uru mai ia ratou; e no reira ua riro ia ei haapaoraa taata anaé.

Faaauhia ei re'o Tahiti e Gihoti Borobiti

Te Mau Parau Apî

TE FEIA API NO HAO

Teie te hoé parau api maitai roa no te Fenua ra o Hao. Te opua nei matou ia faatia i ta tatou Amuiraa i reira, i te 6 no Atopa. A faaroo ai te feia api o Hao i taua parau ra, haamata i hora ratou, ma te itoitoe, i te hamani i te hoé fare putuputuraa i reira. E fare rahi e te nehenehe ta ratou i hamani, e ua oti roa na roto i to ratou itoitoe i te raveraa i te mau ohipa maitatai.

TE FEIA API NO TAKAROA

Ua haamata faahou te feia api no Takaroa i te faatairaa i te pû, e mea navenave roa te mau pehe ta ratou i faatai mai. Na Taumata â Mapuhi ratou i faatere, e ua oti nehenehe roa ia'na.

TE HAERE NEI TE OHIPA I MUA

I te avaé i mairi aénei ua reva na taata maori mai Niu Zilani atu i Vaihi. E feia ratou no te Ekalesia, e ta ratou tere i Vaihi, oia hoi, ia rave i te ohipa i roto i te Hiero i reira. Te haere nei te ohipa a te Fatu i mua i te mau fenua atoa.

O LINDBERGH E TA'NA VAHINE

Ua faarootatou i te roo o te taata ra, o Lindbergh, o tei faatere i to'na pahi reva mai Niu Yoka e tae roa atu i Pari. Ua faaipoipo oia i te Vahine i te hoé avaé i mairi aenei; e teie nei, ua tae mai te parau api, ua haapii oia i ta'na Vahine ia nehenehe ia'na ia faatere i te pahi reva ia'na iho ei tauturu-raa i ta'na tane i ta'na ohipa. E no reira, a haapii outou, i ta outou mau vahine ia nehenehe ia ratou ia tauturu ia outou.

E MA'I TAOTO

Ua itehia te hoé maí ino roa i te fenua Iapone, oia hoi, te maí taoto. Mai teie te tupuraa i taua maí ra, ua mauini te upoo e ua pohe i te taoto. Ia faatia te taata i to'na hinaaro ia taoto, eita oia e ara vave, e haere roa e piti e e toru mahana, e te tahi, ua pohe roa ia. No reira, a ara outou, eiaha outou ia taoto i te ao. E taima raveraa ohipa ia.

E HOORAA MAMOE

E mea maitai paha ia tatou nei ia haamata i te faaapu i te mamoe, no te mea, e moni rahi roa tei noaa mai no taua animala ra. I te hoé haaputuraa no te mau taata faaapu mamoe, ua hoohia te hoé mamoe oni, e teie te moni i noaa mai no taua hooraa ra, oia hoi, e piti tauasini dala moni Amerika, e hoé ahuru tauasini dara moni Farani ia.

TA TATOU HOA, O ALAMA

Ua tae Alama mai i to ratou fenua, ma te maitai e te peapea ore, e te rave nei Alama i ta'na toroa tahito, oia hoi, i te fare hooraa raau o to'na Metua tane. Ua papai mai Alama, e mea puai to'na hinaaro ia amu faahou i te maa i o nei, mai te Komene e te Kaveu te hūru. Te faaite mai nei oia ia ora na tatou.

TA TATOU HOA, O ERANETA

Ua haamanaó tatou i ta tatou hoa tahito, o Eraneta. Ua tae mai te parau api i roto te hoé vea a te Hau e, ua maitihia oia ei taata faatere no te hoé fare hotera rahi i roto Miti. Ua maitihia oia no taua ohipa ra, no te mea, e taata paari e e taata parau tia oia.

NO TAE GA

E mea huru rahi te mau taata o tei hohonihia e te maó i teie mau mahana. Ua tae mai te parau api ia tatou nei, ua haere Kirianu a Mariteragi no Taega i te ravaí e ua hohonihia to'na avae e te maó. A hio maitai outou ia ore ia amuhia e teie nei iá taehae.

I VAIHI

I te avae i mairi aenei ua haere te hoé faehau ia hopu-hopu i te miti i te hoé vahi hopuhopuraa i Vaihi. Ua faaroo ta'na mau hoa ia'na i te aueraa e ua ite ratou ia'na i te haereraa i raro, e ua moé atura. I te tahi mau mahana i muriho, ua haere te hoé taata e ta'na na tamaiti i te ravaí. Ua taamu ratou i ta ratou anavai i te hoé raau paari i nia i te fenua, e ua vaiho ratou i te reira i te hoé mahana, e hoé ahuru ma piti matau tei nia iho i te anavai. Poipoi aera, haere mai ra ratou, ite ihora ratou ua amuhia ta ratou matau e te hoé maó, e ua fatata i te pohe. Huti ihora ratou ia'na i uta e ua tapuhia oia, i reira i itehia te mau ivi e te piripo o teie faehau i moé i na mahana i mua'e. E ono hanere kilo te faito no teie nei maó.

TA TATOU HOA, O ADAMU

Ua tae atu Adamu i to'na fenua ma te maitai e te pea-pea ore, e ua farerei to'na na tuahine ia'na i San Francisco. Hoé noa iho maí te roaa ia'na, oia hoi, te maí i to'na aí no te hióraa i nia i te mau fare teitei i reira. Te aroha mai nei oia i to'na mau hoa i o nei.

NO TE PAHI REVA

Ua rau te huru o te mau parau api ta tatou i faaroo i teie mau mahana no te mau pahi reva o te tamata ia maue noa i nia mai te au i to ratou puai. E mea rahi te mau taata o te tamata i teie nei ohipa, e ua manuia ratou i te maue-noa-raa i nia i na mahana e piti e tae roa'tu i na mahana hoé ahuru. I teie nei avaé ra, ua tae mai te vea no Amerika o tei faaite ia tatou e, e vahi api tei noaa mai i te tahi na taata i taua fenua ra. Oia hoi, o Jackson e Obrian to raua i'oa. Ua haere raua i nia i to raua pahi reva, e ua maue noa raua i nia no na mahana e hoé ahuru ma hitu ma te pou ore i raro i te fenua. Tei ia raua te rê i te ao atoa nei no taua ohipa ra. Teie te hoé uiraa i uihia e te tahi mau taata, oia hoi, eaba te faufaa i noaa mai na roto i taua huru ohipa ra. No te mea, ua rahi te moni i pau e ua pohe te tahi mau taata. Ua pahono mai ra te mau taata paari e, na roto i taua ohipa ra, ua noaa mai te ite no te hamaniraa i te mau pahi reva ei tautururaa no to te ao atoa. Te haapii atoa nei te mau taata faatere i taua mau pahi ra i te huru mau no ta ratou ohipa, ia ore ratou ia hape i te faatereraa.

E EIARAA

Ua tae mai te parau api no te hoé tufaa fenua i Amerika, o tei faaite mai ia tatou e, ua faaea te tahi na fare moni i te ohipa, no te mea, ua eiahia ta ratou moni. Na te hoé manumanu rii nainai ra, i éia taua moni ra. Mai teie te huru, e tufaa fenua faaapu tei parauhia nei, e teie te mea i faaapuhia, oia hoi, te mau anani e te tahi atu â mau hotu. Na teie manumanu rii nainai i haapohe i taua mau hotu ra, e no reira, ua ati roa te mau fare moni, no te mea, na roto i te hoturaa i noaa'i ta ratou moni. E no reira, ua riro teie nei manumanu rii ei tumu no teie ati rahi, ua riro oia ei manu éia i te fare moni.

Marcel Bonnet Imprimeur,
Rue Brea et de la rue Dumont d'Urville, Orovini, Papeete